

**Najib: Haramkan akhbar usaha sia-sia**  
**Malaysiakini.com**  
**October 19, 2010**

Presiden Umno Datuk Seri Najib Razak berkata, usaha untuk menyekat kebebasan media tidak akan membawa apa-apa hasil.

Sebaliknya, usaha perlu ditumpukan untuk memastikan suara daripada golongan yang berpandangan sederhana perlu diberi peluang yang lebih untuk menyuarakan pendapat mereka melalui media.

"(Tindakan) mengharamkan akhbar merupakan usaha yang sia-sia tapi (sebaliknya) perlu pastikan bahawa media membawa suara yang rasional.

"Suara seperti itu perlu dibawa dengan cara yang lebih nyata," katanya lagi.

Bagaimanapun, ini tidak bermakna negara tidak lagi memerlukan undang-undang untuk mengawal media.

Tambahnya, media juga perlu bertanggungjawab dalam laporan mereka.

"Mereka tidak boleh menghukum dengan mudah tentang apa yang baik atau buruk tentang negara ini," katanya.

Katanya lagi, kini timbul keperluan untuk menyekat pengaruh golongan ekstremis yang kini semakin kuat dengan kemunculan media baru.

Tanpa menamakan pihak terbabit, Najib berkata sebelum ini golongan berkenaan terpisah daripada satu sama lain.

"Sekarang dengan kemajuan teknologi, mereka berjaya menemui satu sama lain dan membentuk komuniti," katanya ketika menutup satu forum antarabangsa di Pusat Dagangan Dunia Putra hari ini.

Tambahnya, pihak yang disifatkannya sebagai "golongan sensitif" mudah untuk beralah kepada pandangan ekstrem, namun kini timbul keperluan supaya suara mereka diberi ruang yang lebih luas.

Katanya, langkah itu perlu bagi membolehkan suara daripada golongan yang berpandangan sederhana sentiasa diketengahkan.